



Concello de Cangas

RECOLLIDA FIRMAS DA PLATAFORMA EN DEFENSA DA SANIDADE PÚBLICA DE CANGAS

Cangas, 07/03/2017

Foron 5.150 as firmas recollidas durante estes últimos meses pola Plataforma en Defensa da Sanidade Pública de Cangas. Firmas que plasman as inquietudes, enfados e indignación da veciñanza canguesa.

Desde a Plataforma notaron que a xente precisaba que estiveran na rúa, e así o fixeron. Sen necesidade de cores políticas e pola defensa do clamor de todos os veciños e veciñas que necesitan que a súa voz sexa escoitada por todas as institucións.

Para o Concello, o traballo realizado pola plataforma supón un insufla de moral importante. O Alcalde, Xosé Manuel Pazos, recorda que levan meses esperando a que o Conselleiro de Sanidade se digne a recibilos para tratar estas carencias históricas no Morrazo e neste Concello en particular.

"Todos sufrimos as mesmas carencias e necesidades por iso temos que seguir facendo forza. O Concello está disposto a que camiñemos xuntos. A Plataforma da veciñanza ten o apoio do Concello e o Concello ten o seu apoio".

Nos vindeiros días levaranse a cabo xuntanzas con grupos de nais para tratar os diferentes problemas do grupo de pediatría e non se descarta unha maior mobilización se as cousas seguen así. "É un mal froito dos recortes e que estamos a padecer todos e todas. O Conselleiro ten a obriga de escoitarnos e non imos escatimar esforzos. Imos dar a pelexa".

Para a corporación esta presentación de firmas é un primeiro paso. "Agora non queda máis que solicitar novamente unha entrevista co Conselleiro e planificar unha serie de actuacións a seguir ata que nos reciba. O que é un feito e que estas firmas van chegar onde teñen que chegar".

Gabinete de comunicación